



Inatsisartunut ilaasortaq Jens B. Frederiksen, Demokraatit
MAANI

Qilalukkanik qaqortanik qernertanillu pisassiissutinik qaffaaneq pillugu Naalakkersuisunut apeqqummut nr. 118-imut akissut

Kommuneqarfik Upernavimmi aamma Uummannap kommuniani qilalukkanik qaqortanik qernertanillu pisassiissutinik qaffaaneq pillugu Naalakkersuisunut apeqqutitit Naalakkersuisoqarfimma 1. december 2008 tiguai.

1) Naalakkersuisut qinnuvigineqassapput immikkut ittumik pisassanik akuersissuteqarnerminnut tunngavilersuuteqarnertik itisileqqullugu. Minnerpaamik piumasaqaatigissavara kommunit taakkua marluusut immikkut ittumik amerlanerusunik pisassinneqarnissaminnut qinnuteqarneranni sorpianik tunngavilersuuteqarsimanersut?

1 pillugu) Piniarneq aallaaniarnerlu pillugit inatsisartut inatsisaanni n. 12 29. oktober 1999-imeersumi kingusinnerusukkut allanngortinneqartartumi § 2, imm. 3 aamma 4 malillugit piniarnermik aallaaniarnermillu aqutsinermut tunngatillugu piniartut atuisullu ilisimasaasa ilanngunneqarnissaat pingaartinneqartussaavoq, qilalukkanik qernertanik qaqortanillu pisassiissutinik qaffaanermut atatillugu tamassuma pingaartinneqarnissaa Naalakkersuisut qinerpaat.

Februarimi 2008-mi Piniarneq pillugu isumasioqatigiinnermi piniartut atuisullu ilisimasaat sammisat aamma pingaarnersaraat, tassani isumasioqataasut ilisimasatik biologinillu pitsaanerusumik suleqateqarnissaq pingaaruteqartorujussuartut isigaat. Naalakkersuisuttaaq pingaartutut isigaat Naalakkersuisoqarfimma ingerlatsisut allat suleqatigalugit ukiuni pingasuni suliniummut qinnuteqaataa, qulequtalik: "Sumiiffinni aallaaveqartumik pinngortitamik nakkutilliineq", avataaniillu aningaasalersorneqarsinnaappat 2009-2011-imi ingerlanneqartussa.

Upernaviup kommuniata qinnuteqaammuni uku tunngavilersuutigai, i) qilalukkanik pisassiissutit ullut marluk ingerlanerinnaanni tamakkerneqartut, ii) qaleralinniarneq annikillisoq, qalerallit tammakartarmata arferit kigutillit sumiiffimmut takkukkaangata, taamaalillunilu aalisartut/piniartut aningaasarsiornerat eqqorneqartarluni, iii) illoqarfii/nunaqarfii kujalliit pisaqanngitsoornikuusut pisat tamarmik nunaqarfinni avannarpasinnerusuni pisarinqarnikummata kiisalu ii) qilalukkat amerlasoorpassuit piniartut takunikuugaat. Aalisartut piniartullu aningaasanik ataavartumik isertitaqartariaqarmata Upernaviup kommunia pisassiissutit ilaneqarnissaat qinnuteqaatigaa.

2008-118
8. december 2008
Postboks 269
3900 Nuuk
Oq/tel +299 34 50 00
Fax +299 32 47 04
aapip@gh.gl
www.nanoq.gl

Ummannap kommuniata qinnuteqaammini uku tunngavilersuutigai, i) qilalukkanik qernertanik pisassiissutit 2008-2009-mi 79-iummata ukiut siuliini 90-iusarnikuullutik, tamannalu aamma pisassiissutissat tusarniutigineqarneranni akissummi naammagittaalliutigineqarpoq, ii) qilalukkanik qaqortanik 2007-2008-imi tamakkerneqarnikuunngitsut, pisarineqanngitsoortullu 2008-2009-mut nuunneqarnikuunatik, iii) qilalukkanik qaqortanik pisassiissutit qulit tamarmik pisarineqareernikut pisassiissutit sinnernagit, iv) qilalukkanik qernertanik pisassiissutit sapaatip akunnerani ataaseq ataallugu tamakkerlugit pisarineqangajalersut, v) qilalukkat takkusimaarnerat pissutigalugu qaleralinniarneq uninngamat, vi) aalisartut/piniartut aningaasarsiorfeqanngimmata. Ummannap kommuniata qilalukkanik qernertanik 50-inik aamma qilalukkanik qaqortanik qulinik pisassiissutit ilaneqarnissaat taperserpaa. Takukkit aamma ilanngussat qinnuteqaatit tapersiutit arlallit.

2) *Immikkut ittumik pisassinneqarnissamik qinnuteqaatit Naalackersuisut aalajangiiffiginissaat sioqqullugu Pinngortitaleriffik tusarniaavigisimanerlugu?*

2 pillugu) Naamik, Naalackersuisut naliliipput pisassiissutit ilaneqarnissaanni piffissaq suliamik ingerlatsivissaq sivikitsuinnaasoq, Pinngortitaleriffiullu aamma ukiumit pisassiiffiusumi 2008/2009-mi pisassiissutit aalajangerniarnerannut atatillugu junimi 2008-mi tusarniaanermi akissummini erseqqissarpaa qaqortanik qernertanillu qilalugarniarneq pillugu biologit pisortatigoortumik siunnersuutaanni Joint Committee on Narwhale and Beluga (JCNB) 2006-mi siunnersuutaanneersoq. Misissuinerit nutaanerit pitsaassusaat sulit qulakkeerneqarnikuunngilaq imaluunniit suleqatigiiffinni tassunga attuumassuteqartuni oqaluuserineqarnikuunatik, taamaalillunilu siunnersuutit nutartikkat maannakkumut suliarineqarnikuunatik. NAMMCO/JCNB-ip qilalukkat qernertat qaqortallu pillugit Joint Working Group-iani ataatsimiinneq tulleeq pissaaq sapaatit akunnerisa arfineq pingajuanni 2009 Kommissionilu upernaakkut kingusinerusukkat ataatsimiissalluni.

3) *Immikkut ittumik pisassanik qafaanissaq manna tikillugu Pinngortitaleriffimmit innersuutigineqareersimasut tunngavigalugit akuersissuteqarsimaneq ingerlanneqarsimanerluni?*

3 pillugu)

| Qernertanik qilalugaqarfik | 1. juli 2008-mi pisassiissutit | 9. december 2008-mi pisassiissutit | 9. december 2008 tikillugu pisat |
|-----------------------------------|---------------------------------------|---|---|
| Kalaallti Nunaata kitaa | 300 | 390 | 267 |
| Upernavik | 70 | 120 | 78 |
| Ummannaq | 79 | 119 | 87 |

Naamik Pinngortitaleriffiup Non Detremental Finding-imi (NDF) nalunaarusiami inerniliinera maannakkorpiaq "negativ"-iuvoq, uppersarneqarsinnaanngimmat pisat qernertanik qilalugaqassutsimut akornutaanngitsut. NDF-imi nalunaarusiami inerniliinerup allanngortinnissaanut pisariaqarpoq peqassuseq allanngoriartunngitsoq imaluunniit pitsanngoriartortoq imaluunniit Kalaallit Nunaata

kitaani qilalukkat qernertat pisat tamarmiusut, Qimusseriarsuaq pinnagu (qilalukkat qernertat 90-it) ukiumut 135-it ataakkaat.

| Qaqortanik qilalugaqarfik | 1. juli 2008 pisassiissutit | 9. december 2008 pisassiissutit | 9. december 2008 tikillugu pisat |
|----------------------------------|------------------------------------|--|---|
| Kalaallit Nunaata kitaa | 200 | 260 | 192 |
| Upernavik | 56 | 106 | 135 |
| Uummannaq | 10 | 20 | 10 |

Naamik, Pinngortitaleriffiup NDF-ip nalunaarusiaani inerniliinera "positiv"-iuvoq, tassa peqassutsip uppernarsaatissaqartumik siusinnerusukkut ajorsiarternera aqutsinerup kinguneranik unittutut isikkoqarmat, tassa pisat ikiliartortinneqarnikuullutik. Kisiannili Kalaallit Nunaata kitaani qilalukkanik qaqortanik pisassiissutit 160-iniik 189-inut qaffanneqarneri NDF-ip nalunaarusiaani inerniliinerup nalilersoqqinneqarneranik kinguneqarsinnaavoq.

Erseqqissaqqissavara atuisut piniartullu ilisimasaasa tusaaniarnissaannut Naalackersuisut pisussaaffeqartut, takuuk § 2, imm. 3 kiisalu inatsimmi siunertaq pillugu paragraffi isiginiassallugu, taannalu atuarneqarsinnaavoq § 2, imm. 2-mi.

”§ 2. Inatsisip siunertaraa piniagassanit isumalluutit pissusissamisoortumik uumassusillillu eqqarsaatigalugit illersorneqarsinnaasumik iluaqutigineqarnissaasa qulakkeerneqarnissaat.

Imm. 2. Inatsisip atortinneqarnerani isumalluutit piujuarnissaat kinguaassioortuarnissaallu, ileqquusumik uumassusilinnik misissuisut siunnersuinerat naapertorlugu eqqarsaatigilluagaasumik ukiullu qanoq ilinera eqqarsaatigalugu pissarsiffiunerpaasumik iluaquteqarniarnissaq, piniarnermik inuussutissarsiuqarnermi inuussutissarsiutinilu tamatumunnga attuumassuteqartuni aningaasaqarniarnikkut suliffissaqartitsiniarnikkullu isiginiagassat, inuussutissarsiornermi soqutigisat allat kiisalu innuttaasut sunngiffimmini sammisassaqaarnissamut pisariaqartitaat pingaartinneqassapput. *Imm. 3.* Piniarnermut aallaaniarnermullu tunngasutigut aqutsinermut atatillugu ilaatigut kattuffiit attuumassuteqartut kiisalu Piniarneq pillugu Siunnersuisoqatigiit aqqutigalugit piniartut atuisullu ilisimasaasa ilanngunneqarnissaat pingaartinneqassapput.”

Inussiarnersumik inuulluqqusillunga

Finn Karlsen

Aalisarnermut, Piniarnermut Nunalerinermullu Naalackersuisoq

Akissuteqaammut ilanngunneqarput:

Ilanngussaq 1. Qilalukkanik qaqortanik pisasseeqquttoqarnissaannik Upernaviup Kommuniata qinnuteqaataa 9. oktoberimeersoq.

Ilanngussaq 2. Qilalukkanik qaqortanik pisasseeqqittoqarnissaanik NAPP-ip, Nuussuaq, qinnuteqaataa 9. oktoberimeersoq.

Ilanngussaq 3. Qilalukkanik qaqortanik pisasseeqqittoqarnissaanik UAPP-mit, Kullorsuaq, qinnuteqaat 9. oktoberimeersoq

Ilanngussaq 4. Qilalukkanik qaqortanik qernertanillu pisasseeqqittoqarnissaanik KAPP-mit, Kangersuatsiaq, qinnuteqaat 10. oktoberimeersoq

Ilanngussaq 5. Qilalukkanik qernertanik pisasseeqqittoqarnissaanik KNAPP-mit, Upernavik Kujalleq, Kangersuatsiaq aamma Aappilattoq, qinnuteqaat 23. oktoberimeersoq.

Ilanngussaq 6. Qilalukkanik qernertanik pisasseeqqittoqarnissaanik NAPP-mit, Nuussuaq, qinnuteqaat 24. oktoberimeersoq

Ilanngussaq 7. KAPP-miit, Kangersuatsiaq, ilanngussaq 5-imut tapersiilluni allakkiaq 31. oktoberimeersoq.

Ilanngussaq 8. KNAPK-miit ilangussat 5-6-imut tapersiilluni allakkiaq 3. novemberimeersoq.

Ilanngussaq 9. KNAPP Uummannamiit qilalukkanik qernertanik 70-inik aamma qilalukkanik qaqortanik 15-inik qinnuteqaat.

Ilanngussaq 10. Uummannami nuliaasunit/inooqataasunit ilanngussaq 9-mut tapersiilluni allakkiaq 18. novemberimeersoq.

Ilanngussaq 11. Uummanaq Kommuneanit ilanngussaq 9-mut tapersiilluni allakkiaq 20. novemberimeersoq.

Ilanngussaq 12. Ukiumi pisassiiffimmi 2008-2009-mi qilalukkanik qaqortanik qernertanillu agguassinsisaq pillugu tusarniaanermi Pinngortitaleriffimmit akissut 9. junimeersoq.